

UCAPAN YAB PERDANA MENTERI,  
DATO HUSSEIN ONN, DI UPACARA  
MERESMIKAN BANGUNAN BARU KOMPLEK  
KEWANGAN, DI JALAN RAJA CHULAN,  
KUALA LUMPUR, PADA 2HB. JULAI,  
1979 - JAM 4.00 PETANG.

---

YANG BERHORMAT ENCIK GHAFAR BABA,  
PENGERUSI KOMPLEK KEWANGAN MALAYSIA BERHAD,

YANG BERHORMAT MENTERI-MENTERI DAN TIMBALAN-  
TIMBALAN MENTERI,

AHLI-AHLI LEMBAGA PENGARAH DAN PEGAWAI  
SERTA KAKITANGAN KOMPLEK KEWANGAN MALAYSIA BERHAD,

DEF-DEF KEHORMAT,

TUAN-TUAN DAN PUAN-PUAN SEKELIAN.

Majlis peresmian bangunan pada hari ini amatlah besar maknanya kepada Komplek Kewangan Malaysia Berhad. Dengan mempunyai bangunannya sendiri tersergam, maka dapatlah ia menempatkan semua anak-anak syarikatnya dibawah satu bumbung.

2. Saya mengucapkan tahniah kepada Komplek Kewangan di atas kejayaannya ini. Saya juga mengucapkan berbanyak terimakasih

serta setinggi-tinggi penghargaan kepada Lembaga Pengarah dan Pengurusan, terutama kepada Pengerusinya, Encik Ghafar Baba, kerana memberi penghormatan kepada saya meresmikan pembukaan bangunan ini.

3. Sebagaimana yang telah dinyatakan oleh Encik Ghafar tadi, bahawa Komplek Kewangan ini telah ditubuhkan pada awal tahun 1973. Penubuhannya telah meningkatkan lagi kegiatan pelabur-pelabur Bumiputra dari semua lapisan masyarakat dengan melibatkan diri dengan secara tidak langsung, di dalam syarikat-syarikat swasta. Keupayaannya ini membayangkan bahawa masyarakat Bumiputra telah sedar betapa pentingnya mereka melibatkan diri dalam pelaburan-pelaburan syarikat swasta.

3.

4. Dengan adanya sokongan seperti ini, maka dapatlah Komplek Kewangan dan anak-anak syarikatnya bergerak dengan lebih cergas dan berkesan lagi, menggembelinkan sumber-sumber kewangan kaum Bumiputra. Penyertaan rakyat Bumiputra, terutama dalam sektor ekonomi moden, perlulah ditingkatkan lagi supaya matalamat menyusun semula masyarakat, sebagaimana yang ditetapkan di bawah Dasar Ekonomi Baru itu, dapat dicapai sepenuhnya. Saya harap kaum Bumiputra seluruhnya dapatlah meningkatkan lagi wang simpanan mereka dengan cara menyimpan di dalam institusi yang sedia ada atau melabur melalui institusi kewangan Bumiputra seperti Komplek Kewangan ini.

...4/-

Tuan-tuan dan Puan-puan sekalian.

5. Sejak pelancaran Dasar Ekonomi Baru hampir sembilan tahun yang lalu, hakmilik modal saham kaum Bumiputra termasuklah kepentingan Bumiputra pada keseluruhannya, telah meningkat daripada \$280 juta dalam tahun 1971 kepada \$2,156 juta pada tahun 1978. Jumlah ini merupakan 10.3% daripada jumlah besar hakmilik modal yang terkumpul. Kejayaan ini belumlah lagi memuaskan, terutama jika diambil kira bahawa daripada jumlah 10.3% ini kaum Bumiputra perseorangan hanya memiliki sebanyak 3.6% sahaja. Angka ini adalah terlalu kecil. Kita hanya mempunyai sebelas tahun lagi sebelum berakhirnya tempoh jangka yang ditetapkan untuk pelaksanaan Dasar Ekonomi Baru, pada tahun 1990. Kita harus sedar bahawa kejayaan pelaksanaan Dasar ini bergantung, antara lain, kepada keupayaan dan kebolehan kita meningkatkan lagi sumber kewangan

5.

kita, disamping mewujudkan, membangun dan menambahkan bilangan usahawan-usahawan Bumiputra.

6. Dalam masa pelaksanaan Dasar Ekonomi Baru ini berbagai agensi Kerajaan dan berbagai bentuk institusi pelaburan telah ditubuhkan. Kesemuanya bertujuan membuka peluang kepada pelabur-pelabur Bumiputra melabur sumber kewangan mereka bagi menjamin masa depan kaum Bumiputra. Kemudahan yang disediakan oleh Komplek Kewangan ini merupakan satu daripadanya. Tiap-tiap tabung Kumpulan Modal Bumiputra yang telah dilancarkan oleh Komplek Kewangan ini di masa-masa yang lalu, telah mendatangkan pulangan modal yang memuaskan. Dengan adanya galakan ini, maka pelancaran Tabung Kesepuluh Kumpulan Modal Bumiputra pada bulan Oktober tahun lalu, telah berjaya mengembeling sebanyak \$15.2 juta. Ini adalah

6.

\$5.2 juta lebih daripada yang dikehendaki.

Pelabur-pelabur Bumiputra kini telah mula menghargai aktiviti pelaburan seperti yang disediakan oleh Komplek Kewangan ini.

7. Kebanyak agensi Kerajaan dan institusi pelaburan yang ditubuhkan bagi membantu pelaksanaan Dasar Ekonomi Baru, telah mengalami berbagai cabaran dan dugaan. Ada yang telah dapat mengatasi segala-galanya dan mencapai kejayaan yang amat menggalakkan. Oleh kerana mereka ini ditubuhkan sebagai pemegang amanah kaum Bumiputra, maka sudah sampailah masanya pertimbangan diberikan supaya sebilangan perusahaan-perusahaan yang menguntungkan yang dikendalikan oleh agensi-agensi ini, di pindah milik kepada kaum Bumiputra yang berkebolehan dan berkeupayaan.

8.           Ajensi-ajensi Kerajaan hendaklah sedar bahawa sebagai pemegang-pemegang amanah kepada kaum Bumiputra, mereka adalah bertanggungjawab bagi memupuk dan membimbing serta memajukan lagi pengusaha-pengusaha Bumiputra, di samping mewujudkan usahawan-usahawan Bumiputra yang baru. Mereka tidak harus wujud bersaing diantara satu sama lain, lebih-lebih lagi bersaing dengan kegiatan yang dijalankan oleh pengusaha-pengusaha Bumiputra secara individu. Mereka mestilah bekerjasama serta menyelaraskan kegiatan-kegiatan mereka supaya keupayaan dan kemampuan melabur modal di kalangan kaum Bumiputra dapat ditingkatkan lagi. Peranan ajensi-ajensi ini hendaklah sebagai penggerak dan pemegang amanah. Di mana-mana yang sesuai dan menasabah mereka patutlah memberi perlindungan kepada kaum Bumiputra yang memerlukannya. Kepada kaum Bumiputra seluruhnya, saya berharap mereka akan terus mengambil peluang ini untuk

8.

memperbaiki diri sendiri, demi menjamin kepentingan dan masa depan kaumnya sendiri.

Tuan-tuan dan Puan-puan sekalian.

9. Kemudahan-kemudahan yang disediakan oleh institusi kewangan seperti Komplek Kewangan ini, antara lain, membolehkan kaum Bumiputera menikmati keuntungan melalui berbagai bentuk pelaburan. Saya difahamkan bahawa Komplek ini menerusi Pelaburan Amanah Nasional Berhadnya, yang kini mempunyai pengurusan pelaburan profesional, akan melancarkan rancangan baru yang akan memberi peluang kepada kaum Bumiputra melabur di dalam saham-saham syarikat-syarikat yang tertentu. Sekim seperti ini merupakan satu cara bagaimana pelabur-pelabur Bumiputra boleh menikmati keuntungan dalam pelaburan saham-saham syarikat dan pelaburan

saham-saham syarikat dan pelaburan harta dengan cara membeli saham-saham yang dikeluarkan oleh syarikat Amanah Saham itu sendiri.

10. Di samping itu, menerusi anak-anak syarikat yang lain Komplek Kewangan ini juga menyediakan kemudahan-kemudahan pelaburan lain seperti kemudahan pasaran wang jangka pendek, perkhidmatan Bank Saudagar, perkhidmatan pinjaman, perkhidmatan broker wang dan mata wang asing, broker insuran dan perkhidmatan syarikat peminjam. Melalui Komplek ini juga segolongan Bumiputra yang mahir dalam bidang pasaran saham telah dapat diwujudkan. Mereka ini kini sedang berkhidmat dengan agensi-agensi atau institusi-institusi kewangan yang lain. Sumbangan Komplek Kewangan ini dalam bidang kemahiran pasaran saham sangatlah membanggakan.

10.

11. Saya amat menghargai serta menjunjung tinggi pengakuan yang telah dilafazkan oleh Encik Ghafar tadi bahawa Komplek Kewangan ini akan sentiasa bekerja keras menunaikan tugas dan tanggungjawabnya. Sesungguhnya, amanah dan kejujuran hendaklah menjadi mutu kelayakan utama sifat dan sikap setiap ahli lembaga pengarah dan kakitangan pengurusan dalam sebarang institusi kewangan, terutama badan-badan yang telah diamanahkan oleh rakyat. Pada setiap masa, mereka mestilah mengutamakan kepentingan rakyat lebih daripada kepentingan diri sendiri. Sifat-sifat mulia dan terpuji ini akan dapat mengukuhkan lagi kepercayaan rakyat kepada sesebuah institusi.

12. Memandangkan kepada perkembangan dalam beberapa tahun yang akhir ini, saya mengingatkan setiap pegawai dan kakitangan yang bertugas dengan

...11/-

institusi-institusi yang menjaga kepentingan ekonomi orang-orang Melayu dan Bumiputra supaya mengukuhkan lagi semangat keimanan dan kesetiaan. Mereka hendaklah sentiasa bersedia untuk berkhidmat dan berbakti secara jujur dan ikhlas. Inilah sebaik-baik sumbangan bagi menjamin kedudukan ekonomi bangsa dan negara yang kukuh. Kesilapan, kepinangan dan kelemahan yang telah berlaku pada masa-masa yang lalu hendaklah dijadikan contoh tauladan yang baik. Janganlah hendaknya kita menyalah gunakan kebijaksanaan dan kepakaran kita untuk kepentingan diri. Kita mestilah menjunjung tinggi amanah dan kepercayaan rakyat yang memerlukan kepimpinan yang bijak dan jujur, daripada pihak pengarah dan pengurusan.

13. Berbalik kita kepada majlis peresmian ini, saya sukacita menyatakan bahawa keputusan Komplek Kewangan melabur semula keuntungannya

dalam bentuk harta tetap adalah satu langkah yang baik. Saya percaya Komplek Kewangan ini akan dapat menggunakan kemudahan baru ini untuk memesatkan lagi usaha dan kegiatannya dan anak-anak syarikatnya di masa-masa akan datang. Saya mendoakan selamat maju-jaya. Saya juga mendoakan semoga Allah sentiasa memberi perlindungan kepada setiap orang yang menggunakan Bangunan ini serta menjayakan semua syarikat dan perusahaan yang berlindung di dalamnya.

Tuan-tuan dan Puan-puan sekalian.

14. Dengan ini, saya dengan nama Allah yang amat pemurah lagi amat mengasihani, meresmikan pembukaan Bangunan Komplek Kewangan Malaysia Berhad.

Terimakasih.

\*\*\*\*\*

~~LICAPAN: ADNO~~

~~663 - 48/81~~



No Siri ..... 450  
No Penerimaan ..... 78/81